

Los fuertes son sonces pal asturianu

CARLOS SUARI RODRIGUE *

Como l'albidrar de lo que diba pasar nos años vinientes cola política llingüística n'Asturies, la presente llexislatura entamó errada. El PSOE y el PP, como ye vezu, nun presentaben nos sos programes electorales de 2003 propuesta nenguna alreduer de la normalización del asturianu, mentantu qu'Izquierda Unida asumía la promesa de la oficialidá tres d'escoyer presentase n'estratéxica coalición col Bloque por Asturies, formación ñacida pa la ocasión pero tamién fallida dende l'aniciu al nun consiguir xuntar nesi espaciu más persones que delles que proveníen de l'antigua INA pesie a los intentos del círculu de Valledor nun trabayu de captación que se desendolcó dexando claro que, al cabu, aquello nun diba ser más que l'empréstanu de determinaos nomes o ciertos sigles a la causa de la salvación d'IU, que n'Asturies, yá dende entós en brutal cayida, paecía y paez dirixise escontra una fin anunciada cuantayá, circunstancia que yá taben tentando de tornar dende muncho primero n'otros territorios del estáu per aciu d'estremaes xuntures con fuercies fundamentalmente ecoloxistes o nacionalistes. Una campaña que s'asoleyó al traviés d'un manifiestu que güei fadrá arrojar los papos de vergoña a más d'un d'aquéllos, los sos, con tol respetu, inxenuos o posibilistes firmantes. Y ye que la necesidá de creyer en daqué meyor que na llaceriosa situación del asturianismu fixo que munches persones d'ámbitos variaos apostaren por esa opción nueva ensin evaluar lo qu'IU podía ufrir col so inesistente currículum asturianista.

Desgraciadamente, los que decidimos nun formar parte d'aquel caldu de futuru gobiernu, apotemos: pocu tiempu depués d'unes elecciones nes qu'IU quedó perbién asitiada pa xugar un papel importante como llave, zarrábense unes negociaciones como enxamás se viera, resultando que la parte más pequeña del futuru gobiernu, tovía diba rematar el procesu con un poder proporcional menor, vendiendo asina de baratu'l so sofitu a un yá presidenciable Areces. Compra que nun sólo-y salió barata al PSOE no que cinca al repartu de puestos, cosa que, comprenderáse, nun me da muncho más, tamién quedó como en segundes rebaxes el desendolcu de dellos finxos electorales que Valledor y Iglesias defendíen selmanes enantes como irrenunciabes y que nel casu de nun formar parte d'un hipotéticu alcuertu de gobiernu col PSOE diben provocar l'automáticu abandonu de les negociaciones d'Izquierda Unida. Asina, el pautu llegó, y les hipótesis quedaron pa prau, siendo les promeses electorales yá daquella menos que fumu... La oportunidá siempre suañada del asturianismu, y principal reclamu d'aquella candidatura, acababa de morrer en manes d'una fuercia política supuestamente fuerte qu'enllenó la boca d'electoralismu prometiendo vaques gordes pal asturianu y que finó empapizándose con unos pocos sitios que namás sirvieron pa defraudar como nun se conocía precedente; y lo que tien más cantu, llevando, amás, tol vientu a favor. A partir d'esi momentu, los apoyos que tuviere'l proyectu dixebráronse, bona parte d'ellos marcharon pa casa faciendo más o menos ruiu al reconocer l'engaño que constituyere la estratexa d'IU, y otros siguieron y siguen calteniendo anguaño una sospechosa creyencia na povisa d'aquel petardu. El pautu de gobiernu supunxo pal idioma, en llinies xenerales, un "plan de normalización" aprobáu dos años depués y que convierte esa mesma denominación nun chiste triste, que se concreta, por exemplu, nuna revisión toponímica escasa y estrada de remiendos que nun tresciende acullá de les fueyes del BOPA, nel allancamientu de la llingua asturiana na mesma indignante situación dientro del enseñu, o n'artefectos d'axitprop como'l conceptu de "rede de normalización" (nun toi criticando, quede claro, el llabor de los oficinistes de los conceyos), pa desembocar,

nesi mesmu exerciciu de vacíu, nun exemplu de la brutal necesidá d'autoxustificase en medio la nada: l'observatoriu. Dende'l primer momentu l'ausencia de política llingüística quixo tapecese colos perconociós "val más poco que ná" o "nun se pudo facer más", sabiendo que nun-yos quedaba otro pa salvar la pelleya que combayar col asturianismu, asoleyando "lo malonos que son pá Areces y ma FSA col asturianu". ¿Cudien daveres que con tala estratexa infantil llograren daqué? ¿Daránse cuenta los que siguen protexéndolos anguaño a cambiü de nada de qu'entá interpreten un papel más patéticu que los mesmos interesaos? A la fin, el verdaderu problema sigue siendo'l mesmu: pudo facese más y ellos sábenlo hasta tal puntu que reconocerán qu'una política como l'actual nun diba ser tolerada nin siquiereamente por ellos mesmos (IU-B) si'l PSOE güei gobernare solu.

Cuasi trenta meses depués, anque yá per segunda vegada nesti mesmu añu, prácticamente toos (los qu'examás tuvimos, los que tuvieron y los que tán o siguen nel posibilismu o la fe sofitando'l proyectü d'IU-Bloque) volviemos a compartir espaciu físicu, l'asfaltu bonal d'un sábadu soleyeru, pa pidir lo de siempre, igual que cuando gobernaben Marqués, Vigil o De Silva, lo mesmo qu'enantes de les elecciones de 2003. Otra vuelta medies sorrisos y miraes de regüeyu, y yá na catedral, retrái d'una marea sele, recuentu. Tou actu públicu de protesta vese como l'amuesa de la importancia de la reivindicación pola que se fai, siendo les manifestaciones y los apasionaos alderiques posteriores sobre la so repercusión l'exemplu más paradigmáticu. Aceptando que la participación fuere de 10.000 persones na manifestación convocada pol CAO pal 5-P y remanando la cifra redonda del millón d'habitantes d'Asturies, entendemos qu'ellí tuvo cerca del 1 por cientu'l país, equivalente a qu'en Cataluña, un suponer, se xuntaren más de 67.000 persones pa dalgo paecío. Otramiente, hai que recordar que según les encuestes del profesor Llera, malpenes dos terceres partes de la población asturiano tán d'alcuertu cola oficialidá, lo que reduz la participación potencial nestes convocatories. La estructura xeográfica del nuesu país y en concreto la situación de delles árees rurales mui mal comunicaes cola capital, faen que pa muncha xente llegar a Uviéu seya cuestión de más d'una hora de viaxe, mucho más inda, si falamos de tresporte públicu.

Anque estos datos puedan poner meyor tastu na boca, pensar anguaño nun techu de convocatoria de 10.000 persones nun dexa sensación de tranquilidá a naide. Asina que ye obligatoriu plantegase por qué nun se ye pa consiguir meyores resultaos nun contestu solidariu como'l CAO au s'alcuentren mui bien d'organizaciones ente les que tán delles de les más fuertes, destacando la presencia d'IU-Bloque, qu'al empar, gobierna y "reivindica" aquello que nun ye a consiguir gobernando, nuna paradoxa difícil d'entender. Otros partíos, sindicatos, asociaciones de mocedá, culturales, etcétera, formen parte tamién d'esi Conceyu que güei representa (con dalguna escepción) a les mesmes formaciones que dende va tiempu apuesten pola oficialidá. Dientro d'esti espaciu, la Xunta Pola Defensa de la Llingua y la Xunta Moza furrulen como motores alministrativos y organizativos, arrecostinando cola preparación de tolos actos que se fixeron hasta agora, mentes que'l restu d'agrupaciones trabayen iguando'l tarrén y convocando a los sos militantes con desigual enfotu a los actos qu'en xunto programen. Llamentablemente, y como yá se ta faciendo norma dende cuantayá, les formaciones teóricamente más pequeñes, son les que más trabayu invierten, involucrando a porcentaxes notables de la so militancia nun tema que, supónse, ye d'interés pa toes y caúna les organizaciones que formen esti espaciu común, y non sólo pa les más minoritarias. Sábase que les trés organizaciones teóricamente fuertes son IU, CCOO y UXT, toes demostradamente solventes na movilización de xente n'otres

manifestaciones, xusto al revés de lo qu'asocede néstes, au la so inoperancia (bien por incapacidá o incoherencia) principia a ser insoportable, más tovía si lo comparamos col esfuerciu qu'IU y CCOO fixeron cuando'l Pautu pola Oficialidá y l'Autogobiernu. Entós yera otru tiempu, y agora, en gobiernu, prima nun dar demasiada guerra cerca yá de firmar una reforma estatutaria qu'una vegada más va sali-y a Areces a preciu de saldu, asina que, poro, ye cenciello atalantar qu'Izquierda Unida nun vaiga echar formientu a un movimientu que va pidi-y responsabilidaes en cuantes ñaza'l nuevu estatutu.

Nun panorama ideal, contar con qu'esas organizaciones fixeren un verdaderu trabayu na reivindicación del asturianu nun sedría sólo falar de cifres que diben dar pa primer plana, sedría, nel casu asturianu, pensar en qu'un partíu qu'apostó estratéxicamente pola utilización electoral del asturianismu y qu'agora co-gobierna, taría siendo fiel a lo dicho, cosa qu'examás fixo, y en dos sindicatos mayoritarios que llucharíen (como ye la so obligación) polos derechos de la xente d'Asturies, porque esta llingua fuere normal na vida y nos papeles. Les deldes étiques que la participación en gobiernu d'Izquierda Unida – Bloque por Asturias y que l'actividá del sindicalismu mayoritariu van dexar na historia de la reivindicación asturianista van ser mui abegoses de compensar na memoria de la mocedá qu'acaba d'averase a esti movimientu pa clamar polo suyo, neto que na moral de los que dende va décadas siguen tirando de la cuerda col mesmu puxu. ¿Habrá tovía quién, siendo un perxudicáu más, xustifique a los qu'un día prometieren y depués pudieron y nun fixeron? De xuru: sí. Por haber, habrá hasta quien diga qu'hai requexos nel aire, pero dende la sensibilidá cola que trabayen yá de vieyo persones n'abondo y la ilusión cola que llega la nueva mocedá asturianista haciendo un apueste por esti país, hai que-yos desixir a los fuertes un poco del esfuerciu y la responsabilidá de los sonces.

(*). Estudiante, miembru de Mocedá d'Izquierda Asturiana (MIAS).